



OFISA IKIPULE KE HE FAAHI TANAKI TUPE MO E POTAAGA LEVEKI KOLOA

FAKAILOAAGA MAHUIGA

Fonoaga he Ikipule he Tupe mo e Tau Koloa he Motu mo e Hukui ha Ausetalia ki Niue, Lilifu Louise Ellerton

Alofi, Niue – 21 Mati 2022 – Ko e aho nei ne fakatutala ai e Ikipule he Faahi Tanaki Tupe mo e Potaaga Leveki Koloa, Lilifu Ikipule Crossley Tatui mo e Komisina Tokoluga ha Ausetalia, Lilifu ko Louise Ellerton.

Kua tumau e Fakatufono Niue ke ponataki e fakafetuiaga mitaki mo e motu ko Ausetalia ke he tau tau loga. Ne fakamooli foki e tuaga nai ke he Ofisa Komisina Tokoluga ha Ausetalia ki Niue ne kua hafagi ke he mahina a Luni 2020.

Fakauhoaki e fakafetuiaga uho nai, ha kua tupu fakahaga e puke tagata he tau Niue ne nonofo mau atu ke he motu ko Ausetalia mo e lagomatai atihake e tau gahua he motu.

Fakamatapatu e fono ke he tau puhala lagomatai tupe mo e falu puhala foaki ma Niue ke he fā e tau ki mua.

Talahau e Ikipule, aoga lahi e fono nai ke iloa kua tumau e tau lagomatai loga ha Ausetalia ki Niue.

Fakamaama mai he Ikipule Tatui, “Ua e matapatu fakaveaga gahua. Fakamua ke tumau e tuaga tokoluga ke muitua a Niue ki ai, ke lata mo e tau tupe moua mai ke fakatolomaki ki mua e tau monuina he tau tagata oti he motu. Uaaki, ko e levekiaga he tau koloa he motu mai he tau lekua tupu fakaafo mo e Hikihikiaga he Matagi”.

“Tu uho foki e tau lagomatai nai ke he tau momoui fakaako he tau fanau Niue, pihia mo e tau lagomatai tupe ma e tau maaga mo e tau matakau i fafo he Fakatufono”.

Talahau he Hukui ha Ausetalia ko e Lilifu ko Louise Ellerton, mahuiga ke fakatupu e Potaaga Tupe ha Niue, Niu Silani mo Ausetalia. Kua fiafia a Ausetalia ke lagomatai e Komiti Gahua ke leveki mo e fakatupe e Potaaga Tupe ke moua e muka ke lata mo e Fatifatiaga Tupe he Fakatufono lagataha he tau.

Amanaki foki a Ausetalia ke fai tupe lagomatai ke he potaaga tupe foou he matagahua NOW (Niue Ocean Wide) he Fakatufono Niue ne fakatū ke lata mo e puipuiaga he tofia mo e moana pukelahi ha Niue.

Fakatupe foki a Ausetalia ke he Atu Pasifika auloa mo e tau kautaha he lalolagi ne fakatupe e tau matagahua tuga e R2R, Hikihikiaga he Matagi mo e Faahi Gahua Hila.

Fakakatoatoa he Ikipule, fiafia a ia he iloa, kua tumau e tau lagomatai ha Ausetalia ki Niue ke he Palana fakatoka gahua he motu 2021-2026, mo e muitua foki ke he Palana COVID-19 ha Ausetalia.

To gahua fakamalolo mo e mahani fakamooli e Fakatufono Niue ke he tau fakaholoaga atihake he Fakatufono ke tumau e falanakiaga mo e fakafetuiaga gahua mo Ausetalia.

Kua fakatoka e lagomatai tupe he Fakatufono Ausetalia ke he AU\$1.4 ma Niue ke lata mo e 2021-2022.

FAKAOTIAGA